



順義縣志卷之四

順義縣知事蜀西晉熙黃成章子達甫修纂

蜀西貢士張大酉文林甫較訂

藝文彙

奏議

碑記

詩句

文以載道比事屬詞藝以博物闡幽傳奇有典有則不蔓不支風雲月露痛快淋漓志藝文

奏議

書思對命羣欽入告之嘉謨拜手颺言共仰陳王之讜論元老抗顏而引裾補闕拾遺大臣正色以立朝獻可替否故欲元首著賡歌喜起之盛必視股肱有批鱗納牖之誠順雖蕞爾昔在唐宋名

賢輩出蹇諤素聞但以人往風微遂至編殘簡斷徒令考古之士  
空嗟叅定之無從又虞傳世之文忍聽湮沒之殆盡用是徧購遺  
書細加繙閱僅得數首亟登諸梓以志先型之猶存前徽之未墜  
云爾

用人

後魏 高 閭 邑人

孝文帝太和三年淮南王他奏求依舊斷祿文明太后令召羣臣  
議之尙書中書監高閭表曰天生蒸民樹之以君明君不能獨理  
必須臣以作輔君使臣禮臣事君以忠故車服有等差爵命有分  
秩德高者則位高而任廣者則祿重下者祿足以代耕上者俸足  
以行義庶民均其賦以展奉上之心君王聚其財以供事業之用

君班其俸垂惠則厚臣受其祿感恩則深於是貪殘之心止竭效之誠篤兆庶無侵削之煩百爾備禮容之美斯則經世之明典爲治之至術自堯舜以來逮於三季雖優劣不同而斯道勿改自中原崩禿天下幅裂海內未一民戶耗減國用不充俸祿遂廢此則事出臨事之宜良非長久之道大魏應期紹祚照臨萬方九服旣和八表咸謐二聖欽明文思道冠百代動遵禮式稽考舊章準百王不易之勝法述前聖利世之高軌置立隣黨班宣俸祿事設令行於今已久苛慝不生上下無怨奸巧革慮闕覲絕心利潤之厚同於天地以斯觀之如何可改又洪波奔激則隄防宜厚姦悖充斥則禁網須嚴且饑寒切身則慈母不保其子家給人足禮讓可

得而生清廉之人不必皆富豐財之士未必悉賢今給其俸則清者足以息其濫竊貪者足以感而觀善若不班祿則貪者肆其奸情清者不能自保難易之驗灼然不知如何一朝便欲去俸淮南之議不亦謬乎詔從閭議

### 征伐

高 閭

孝文帝攻鍾離未尅將於淮南修故城置鎮戍以撫新附之民賜相州刺史高閭璽書具論其狀閭表曰南土亂亡僭主屢易陛下命將親征威陵江左望風慕化尅拔數城施恩布德携民襁負可謂澤流邊方威惠普著矣然元非大舉軍興後時本爲迎降戎卒實少兵法十則圍之倍則攻之所率旣寡東西懸闊難以並稱伏

承欲留戍淮南招撫新附昔世以回山倒海之威步騎數十萬南臨瓜步諸郡盡降而盱眙小城攻而弗克班師之日兵不戍一郡土不闢一塵夫豈無人以大鎮未平不可守小故也堰水先塞其源伐木必拔其本源不塞本不拔雖剪枝竭流終不可絕矣壽陽盱眙淮陰淮南之源本也三鎮不尅其一而留兵守鎮不可自全明矣卽逼敵之大震復隔深淮之險少置兵不足以自固多留衆糧運難可充又欲修築通漕路必由於泗口汴淮而上須經角成淮陰大鎮舟船素畜敵因先積之資以拒始行之路若元戎旋旆兵挫怯夏雨水漲救援實難忠勇雖奪事不可濟淮陰東接山陽南過江表兼近江都海西之資西有盱眙壽陽之鎮且安土樂本

人之常情若必留戍軍還之後恐爲敵擒何者鎮戍新立懸在異境以勞禦逸以新擊舊而能自固者未之有也昔彭城之役旣尅其城戍鎮已定而思叛外向者猶過數萬角城蕞爾處在淮北去淮陽十八里五固之役攻圍歷時卒不能尅以今比昔事兼數倍今以向熱水兩方降兵刃旣交難以恩恤降附之民及諸守令其可徙置淮北如其不然進兵臨之速度士卒班師還京踵大武之成規營皇居於伊洛畜力以待敵豐布德以懷遠人使中國清穆化被遐裔淮南之鎮自効可期天安之捷指辰不遠

救荒

高 閭

太和十四年秋七月尙書中書監高閭上奏曰奉癸未詔書以春

夏少雨憂饑饉之方臻愍黎元之傷悴同禹湯罪亡之誠齊堯舜  
引咎之德虞災致懼詢及卿士令各上書極陳損益深恩被於蒼  
生厚惠流於后土伏惟陛下天啓聖姿利見纂極欽若昊天光格  
宇宙太皇太后以叡哲贊世稽合三才高明柔克道被無外七政  
昭宣於上九功咸序於下君人之量逾高謙光之旨彌篤修服祭  
儀宗廟所以致敬飾正器服禮樂所以宣和增儒官以重文德簡  
勇士以昭武功慮訟獄之未息定刑書以理之懼蒸民之奸宄置  
鄰黨以穆之究庶官之勤劇班俸祿以優之知勞逸之難均分民  
土以齊之甄忠明孝矜貧恤獨開納讜言抑絕讒佞明訓以體率  
土移風勝雖未勝殘去殺成無爲之化足以仰答三靈者矣臣聞

皇天無私降鑒在下休咎之徵咸由人召故帝運昌則九疇叙君德衰而彝倫斁休瑞并應享以五福則康於其邦咎徵屢臻罰以六極則害於其國斯乃洪範之實徵神祇之明驗及其厄運所纏世鍾陽久數乖於天理事遠於人謀時則有之矣故堯湯逢歷年之災周漢遭水旱之患然立功修行終能彌息今考治則有如此之風計運未有如彼之害而陛下殷勤引過事邁前王從星澍雨之徵指辰必可消災滅禍之符灼然自見雖王畿之內頗爲少雨關外諸方禾稼仍茂苟動之以禮緩之以和一歲不收未爲大損但預備不虞古之善政安不忘危有國常典竊以北鎮新徙家業未就思親戀本人有愁心一朝有事難以禦敵可寬其往來頗使

欣慰開雲中馬城之倉以賑恤之足以感德致力邊境矣明察畿  
甸之民饑甚者出靈丘下館粟之以救其乏可以安慰孤貧樂業  
保土使幽定安并四州之租隨運以溢其處開關弛禁薄賦賤糴  
以消其費清道路

隨豐逐食貧富相贍可以免度凶年

不爲患苦又聞常士困則濫竊生匹婦餒則慈心薄凶儉之年民  
輕違犯可緩其使役急其禁令宜於未然之前申敕外牧又一夫  
幽枉王道爲虧京師之獄或恐未盡可集見囚於都曹使明折庶  
獄者重加究察輕者卽可決遣重者定罪以聞罷非急之作放無  
用之獸此乃救荒之常法且以見憂於百姓論語曰不患貧而患  
不安苟安而未生雖遭凶年何傷於民庶也愚臣所見如此而已

法令

竇儀 邑人

宋太祖時竇儀進刑統表畧曰臣與朝議大夫尙書屯田郎中權大理少卿柱國臣蘇曉朝散大夫理正臣奚嶼朝議大夫大理寺柱國臣張希遜等同罄考詳刑部大理法直官陳光文馮叔向等俱效檢尋舊二十一卷今并目錄增爲三十一卷舊疏議節畧今悉備文削出式令宣勅一百九條別編或歸本卷又編入後來制勅一十五條各從門類又錄出一部律內餘條准此四十四條附名例後字稍難識者音於本字之下義以難曉者并例別具條者悉著引於其處又慮混雜律文本注並加釋曰二字以別之務令檢討之司曉然易達其有今昔浸異輕重難同或則禁約之科刑

名未備臣等起請總三十二條其格令宣勅削出及後來至今續  
要用者凡一百六條今別編分爲四卷名曰新編敕凡釐革一  
司一務一州一縣之類非干大例者不在此數

奏議

竇儼邑人

後周世宗方切於治道集賢殿學士竇儼上疏略曰歷代治理六  
綱爲首一曰明理理不明則彝倫不序二曰崇樂樂不崇則二儀  
不和三曰熙政政不熙則羣務不整四曰正刑刑不正則巨奸不  
懾五曰勸農農不勸則資澤不流六曰經武武不經則軍功不盛  
故禮有記若人之衣冠樂有章若人之喉舌政有統若人之性情  
刑有制若人之呼吸農爲本若人之飲食武爲用若人之手足斯

六者不可斯須而去身也世宗多見聽納

## 建官

寶儼

世宗詔中外臣僚有所聞見并許上章議論翰林學士寶儼上疏曰設官分職授政任功欲爲政之有倫在官位之無曠今朝廷多士省事華資無事有員士乃六七止於計月待奉計年待遷其中廉幹之人不無愧耻之意如非歷試何展公才請改兩畿諸縣令及外州府五千戶以上縣令爲縣大夫升爲從五品下畿大夫見府尹如赤令之儀其諸州官縣大夫見本部長如賓從之禮郎中員外郎起居補闕拾遺侍御史殿中侍御史監察御史光祿少卿以下四品太常丞以下五品等并得衣朱紫滿日準在縣一任約

舊官遷二等自拾遺監察除授回日卽起居侍御史中行員外郎  
若前官不是三署卽罷後一年方得來仕如此則士大夫足以陳  
力賢不肖無以駕肩各繫臧否明行黜陟利民益國斯實良規



# 碑記

秦岳封禪岫嶠紀一朝之瑞陰山遠遁燕然銘百世之勲克樹令德於旗常期垂典冊賴鐫茂烈於華表永勒貞珉故欲致文獻之留傳必恒藉琬琰之紀錄順邑傳記碑銘比比而是但以方策沉埋披覽無自篆籀剝蝕摹搨無從寥寥數稿亟鐫諸板以詔來茲

## 大成至聖文宣王贊

泰定四年十月勒石碑在學宮

大成至聖百王是宗爰尊爰敬爵號靡崇於惟皇元歆慕休風式探本源顯加縟封弘揚至理典訓誥命宜參于中遣使闕里瓣香致恭牲具太牢遠叩邃古邁德倫功漢唐兩降奚敢比隆薄海外內匪如太常詎類景鍾溫陽爲郡天京之東獨是闕然僚佐獻謀

堅珉斯龔宜謹拜贊傳美無窮

加封先聖考批

闕里有家系出神明之胄尼山請禱天啓聖人之生朕聿觀人文  
敷求往哲惟孔氏之有作集羣聖之大成原道統則堯授舜傳之  
周文王論世家則契至湯下逮正考甫其明德也遠矣故生知者  
出焉有開必先克昌厥後如太極之生天地如鉅海之有本源雲  
祲旣襲于上公之封考妣宜眎夫素王之爵於戲君子之道考而  
不謬建而不悖予以敦典而叙倫宗廟之禮愛其所親敬其所尊  
予以報功而崇德尙篤其慶以相斯文齊國公叔梁紇可加封啓  
聖王魯國太夫人顏氏可加封啓聖王夫人主者施行